

Sunday, May 3, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT
REGIONAL NEWS BULLETIN
(MIDDAY)



MRB

Chief Minister Pu Lalduhoma'n Mizoramah sum leh pai lam thiamna, financial literacy sang zawk mamawhna a nasa tih a sawi.

Nimina Mizoram Rural Bank Head Office-a Mizoram Rural Bank Branch Manager Conclave 2026 a hmanpuinaah he thu hi sawiin Chief Minister chuan a bik takin thingtlanga Mizo mipuiten bank an mamawh hle a ti a. An tana dawr awlsam nih leh zangkhai zawka dawr theih an nih a pawimawh hle tih a sawi a, Mizoram Rural Bank hotute chu mipuite mamawh phuhru tu ber an nih thu sawiin an lo tih tawh tha tak tak te chhonzawm zel chungin zau zawka hma la zel turin a ngen a ni.

Chief Minister chuan Bank Manager te chu sorkar policy a taka chantirtute an nihna chen a awm tih sawiin sorkar flagship programme Bana Kaihah pheih chuan an ni leh zual a ti a. India rama Regional Rural Bank thanguang tak, Mizoram Rural Bank, Mizote ta an nei chu a hlu hle tih sawiin an hmasawna chanchinin a tihlawm thin thu a sawi a. CD Ratio nei tha ber pawl Bank an ni reng chu a chhuanawm hle a, Bank te CD ratio a san chuan an sum dawn khawm te mipuite tan an pe chhuak tam tihna a ni a, ram hmasawn nan chu chu a pawimawh ani, ati bawk.

MRB hi kum 1983 ah a ding tan a. Mizoram Rural Bank ah hian Govt of India in share zaa 15, Sponsor Bank SBI in zaa 35 leh Govt of Mizoram in zaa 50 an nei a ni. Regional Office 2 bakah Branch 106 an nei mek a, chung zinga 60 chu thingtlanga awm a ni a. Thawktu mi 491 an awm mek a ni.



PRISON

Prisons department report hnunung bera vawiina tihchhuahah Mizoram chhungah lungin tang mi 1713 an awm mek.

Prisons department tarlan danin Central Jail, Aizawlah tang tam berin mi 828 an tang a, tang nei zinga a tlemna ber chu District Jail, Lawngtlai niin mi 74 an tang a. District Jail, Saitualah tang an awm lo thung a ni. Mizorama lungin hrang hrangah

hian tang awm thei zata ruahman aia tam tanna lungin pali awmin - Central Jail, Aizawl chu mi 480 tan theihna tur a nih laiin mi 828 na tang mek a, tang thei zat tura bithliah aiin mi 348 in a tam a ni. Women's Jail, Aizawlah pawh mi 96 tan theihna tur a nih laiin mi 130 an tang mek a, District Jail, Aizawlah, mi 90 tan theihna turah mi 100 an awm mek bawk a, District Jail, Champhai, mi 105 lenna tura ruahmanah mi 198 an tang mek bawk a ni.



STAND UP LAWNGTLAI

Lawngtlai Bawrsap ruahmanna hnuaiia Tho Law Dir Tuah (Stand Up Lawngtlai) hnuaiiah hmalakna bul tan chhoh mek a ni.

Lawngtlai khawpuiin kawng hrang hranga hmasawna hmel a hmuh theih na'na hmalakna liantak, District Administration leh Lai Autonomous District Council (LADC) bakah Village Council leh Tlawmngai pawl te, Chanchinbumite tanhona tur a ruahman, Tho Law Dir Tuah hnuaiiah Lawngtlai khawpuiin Faina, Thianghlimna, Mawina leh inrelbawlina felfai zawk a neih theih na'n beihpui thlak chhoh tan a ni a. May ni 1 atang khan kawngpui kama lirthei dahte chu Village Level Parking Monitoring Committee ten an huamchhung theuhah endikin, LADC in zankhua a dan lova lirthei, kawng kama dahte chawitir tura a bithliah zat an chawitir tan a, heihian kawng kama hnawksak taka lirthei dah thin a tihzia-awm chhoh beisei a ni.

Lawngtlai a veng hrang hrang, kawtchhuah theuhvah chhinchhiahna tar turin ruahman a ni a, khawpui paltlang kawngpui dungah kawng chhuata dah chi eng phum vek tum ani a, khawpui huamchhungah thutchawlhna tam zawk siamte, bawlhhlawh paih na'na hman thinte chubBawlhhlawh awmlohna tura hmalakte chu tun dinhmunah hmalakna langsar zual a ni.

Lawngtlai Bawrsap Pu Donny Lalruatsanga chuan Stand Up Lawngtlai hnuaiiah mitinin phur taka ke an penna atangin Lawngtlai khawpui chuan hmel thar a hmuh thuai a beiseiawm hle a ti a. LADC a CEM Pu C. Lalsawmzuala pawhin tanrualna chuan rah tha a chhuah ngei a beisei thu a sawi bawk a ni.



MISHAP

Nimina Champhai district Vawngzawl phai panna kawnga tractor chesualah a khalhtu a thi a, naupang pahnih an hliam.

Nimin tlai Dar 5:00 vel khan Champhai Hmunhmeltha leh Khawchhak tuiptui lui kianga Vawngzawl phai panna kawngah, Vawngzawl phai atanga hnathawk haw lam phurtu tractor thar, registration number pawh la nei lo chu Hmunhmeltha khaw daiah a chesual a, ruah surin kawng a tih nal avanga chesual ni a hriat a ni a, chetsualna hmunah tractor khalhtu Lalsangliana kum 23 mi, Pu Aidailova fapa, Hmunhmeltha khua chu a boral nghal a. A phurh naupang pahnih kum 14 mi leh kum 12 miten hliam tuarin Champhai District Hospital panpui an nih hnuah naupang malpui ruh tliak chu Aizawla enkawl turin refer nghal a ni.

